

## Nwàk JEM

*Nwàk nè Jem à còm ènə nà' rwiŋ mègù bə ntip sè yà'a bə bum sè yà'a yegè nùumbu pwe'. Yi sə cep bum sə bə gbɛ' mok sè yà' nòjəja. Yi sə jə yà' ŋgòtip bwìŋ bə nsàp ŋkərə nè a bəboŋ də ŋwèe tse' nà', nə ye bə ncu nè bohòKrətèŋ wèŋ. Nwàk ènə cèpgè gɛgɛŋ də ŋwè nè yi dzəmtse' Krəst fana yà' tse' ŋgòyəəŋ bə fàha sè ŋgèŋgàŋ sə gù yà'.*

<sup>1</sup> Còm ŋwàk nè'e mɛ Jem, nè mɛ mo ŋgà fàk Nwì, nə ye Tà Jisòs Krəst. Mɛ cèpsə bwe Izùrɛ sè bòp hum-ncòp-ba sè wo sam cu lo mɛnə nzeŋgòn nə pwe' bəboŋ.

*Məmumsəə Yu Nə  
Aco Nà' Gɛŋsə Wù*

<sup>2</sup> Bwe tè'lam wèŋ, ŋga nsàap məmumsə zəzok sə tesə və-a bohòwèŋ, wèŋ tse' ŋgòkwa cèbùè,

<sup>3</sup> bəusè wèŋ rì duk də bum yè'sə mumsə wèŋ də wèŋ sə fa mali ntəm awèŋ bohòNwì àlɛ, fana yà' gɛŋsə wèŋ.

<sup>4</sup> Təəŋ bə nsàp ntəm nè nà'a gɛgɛŋ tè ya wu ye kəkurè bə bum pwe', nə kà yumok jamè.

<sup>5</sup> A ye-a ŋga ŋwè nəmòk mɛtsətsə'rə wèŋ ka ŋkərə nè co yi gɛ riŋ yumok bə zəŋ tse', yi lɛŋ bohòNwì, Nwìi nə fa yi. Yi fagè ndàaŋwè pwe' bo to bə kwəkwa.

<sup>6</sup> A ye-a ŋga ŋwè sə lɛŋ yumok bohòNwì, yi dzəmtse' sə ntɛù yi də yi nə tse' yà', yi kà də yi sə mərə sə ntɛù yi duk. Bəsè ŋwè nè yi mərə-a,

ye də yi co ndzəp nè fèfè bwì' lògè nà' ma si bə ma ŋkwèŋ.

<sup>7</sup> Nsàp ŋwè nè yi mərəgè bum nà'nə kà tsəm də yi nə tse' yumok bohòTà Nwì tsəm.

<sup>8</sup> Búsè yi tse' tsətsərə ba, nə kà yusè yi dzəm rì.

<sup>9</sup> Krətèŋ nè yi ŋgà jìŋ, yi tse' ŋgòkwa, būsè Nwì a kùksə yi.

<sup>10</sup> Fana moma nè yi ye ŋgà ghàk, yi tse' ŋgòkwa sè', būsè Nwì a būsə yi ŋwè nè jo, būsè yi nə ca gesə lo co mvè'nè nzàam ŋgaŋ ye'gè yé'e.

<sup>11</sup> Nùum togèə, a curə ntèn, nzàam ŋgaŋ ye' gbə sə nze, fana mvəsè yà' anə sə fom sə me nè mvəsè. Yà'a sè' mvmvè'nè ŋgà ghàak nə kpə mak noŋsə bum ghàak ye sə vè'nə.

<sup>12</sup> A rɛŋsi bohòŋwè nè məmumsè sə vè bohòwù, fana wù sə təəŋ mali guguŋ; būsè wù gha'-a məmumsè nə, fana wu nə kə tse' lèlək nè nà'a lùŋ nè Nwì a kək də yi nə fa ndà lòŋ nè nà' dzəm yi nə.

<sup>13</sup> Nsàp məmumsè nà'nə vèə, fana kà də ŋgəŋgàaŋ duk də Nwì sə lap mandzè də yi gbə duk. Búsè kaco wo mumsə Nwì bə bəp yeŋ, fana Nwì kà ye ŋwè bə bəp sə mumsègè.

<sup>14</sup> Məmumsè vègè bohòŋwè ŋga yi tsərə kok bum sə bəp sə ntəù yi.

<sup>15</sup> Nwèè tsərə bum sə bəp yè'sə fana yi gu bəp. A ye ŋga bəp kùu' nà' jəŋ və kpə.

<sup>16</sup> Bwema am wèŋ, kà də wèŋ jipsə tu awèŋ duk.

17 Yusè yà'a bèbon pwe' tsэгè mubu bohòNwì, yi nè yi a gù mareᅇ. Nwì bə tu ye kà kupsègè. Kaco yi buᅇ lo, nə me'rə nonᅇsə ves sə ndzəmə yeᅇ.

18 Nwì à dzəm ko' yi də yi cok fis ves, nə gu ves a buᅇ bwe ye bə ncèp cù nje nè zinə nə, də ya vesùwèᅇ ye buᅇ ye sè mantombi bə bum sè yi a gù sənə nze nə pwe'.

### *Yuk Nə Gu*

19 Bwema am wèᅇ, wèᅇᅇ kà yè'e swì yuk. A ye-a sè ndà lòᅇ, yi nonᅇsə ntu' to ᅇgòyuk bum, nə jəᅇ mvək fùè ᅇkuᅇ nə cep, nə ye sè' fùè ᅇkuᅇ yi jok.

20 Busè ᅇwèe jok-a, kaco yi gu riᅇ to yusè bèbon sè co Nwì kwa bə zeᅇ yeᅇ.

21 Fana nà'a njo nè mù sə tsè' weᅇ də, wèᅇᅇ fis ᅇkù' sə ntuᅇ wèᅇ sə, nə kà jòᅇ sə gù ke'cà. Fa ni' awèᅇ ndzə bohòNwì, nə dzəm tse' megu ncèp ye nè wèᅇ ànə yuk to mvəsè yi a gesè nà' sə ntuᅇ wèᅇ. Mègù ncèp nà'nə nè aco nà' fis weᅇ mvwe' kᅇ.

22 Bo bohòwèᅇ cèbùè də ᅇga wèᅇᅇ yuk-a ncèp ye nə, wèᅇ sə gu yà'. Busè ᅇwè nè yi yuk megu-a yà' bə ntu', nə kà sə gù, fana ye də yi sə bōrə ni' ye.

23 Yi co ᅇwè nəmòk nè yi kək ja'a si ye ndzənə darəgà', nə ye mvè'nè yi cu.

24 Yi yə tsèrə mè si ye bèbon, fana yi lo ntèᅇ, yi swì bisə mvəsè yi anə ye sə jwanᅇ.

25 Wu kək ja'a-na lùuk Nwì sè yà'a yəyərè, sè yà'a fi mè'règè bwìᅇ mvwe' buᅇ sə, fana nə sə gu mām̀vè'nè yà' sə tsè' wu, fana Nwìi nə se wu

bə bum yo sè wù sə gù lònŋfo'. Busè wù sə gù yà', nə kà də wù sə yu'rə mègù bə ntu', nə swi bisə duk.

<sup>26</sup> Nwè nəmòk tsərə-a ye də yi ye n̄wè nè yi sə bɛ' mandzè Nwì, nə kà lum ye bɛŋ, fana ye də mandzè Nwì nè yi sə yùu nə, nà'a wà. Yi sə bòrə yà'sə ni' ye.

<sup>27</sup> Bum sè Tà Nwii kùk ja'agè ye də yà'a mandzè nè zìnə nə ye rərəŋ, a n̄ga n̄wè sə tɛsə bwe n̄j̄ŋ bə bàa yepmfə sè wo sə yə n̄gə', nə sə jəŋ n̄kərə bə ni' ye də ya bum nzen̄gòŋ kà yi n̄gògù yusè b̄p bòrè.

## 2

### *Bwìŋ Pwe' Yəyərè BohòNwì*

<sup>1</sup> Bwema am wèŋ, wèŋ sè wèŋ à fa ntəm awèŋ bohòTà Jisòs Krɛst, nè n̄wè nəmòk kaco yi mok kùk dzen, wèŋ tse' n̄gòjəŋ bwìŋ pwe' yəyərè.

<sup>2</sup> Yusè mù sə duk sə vɛ'; A duk-a də bwìŋ vè mvwe' kwe' b̄u cos bwìŋ ba, n̄gà ghàk bə n̄gà j̄ŋ. N̄gà ghàk nə ni tse' cək nə tasə mv̄iŋ sè yà' gù nteŋ nè b̄p ndzə bohòyi, nè n̄gà j̄ŋ nə ni ye bwe gaa cək.

<sup>3</sup> Wo vəə, wèŋ lap dzè' nè bəbòŋ, nə duk fa n̄gà ghàk nə də, <<Hooyo' vè bəbòŋ, kè cà cum fɛn.>> Nə duk fa n̄gà j̄ŋ nə ye duk də, <<Təəŋ tse' yòfa' nə,>> kè də, <<Kè cum yòsə nze n̄gə kùhu mù fɛn.>>

<sup>4</sup> Wèəŋ ḡ-a vɛ'nə, ye də wèŋ kùk wo ka mù lisè, nə duk sə vəə wèŋ də mok bògha' mok yəŋ à? Wèəŋ ḡ-a vɛ'nə, ye də wèŋ sə sak bwìŋ, nə sa'a nə bə jòŋ.

<sup>5</sup> Bwema am wèṅ-a, yè; Nwì a ghàksə ṅgàa jìṅ yà'sə bə dzədzəm nè yà'wèṅ tse' bohòyi, nè duk də wo nə kə tse' mvwe' ncum mvwe' lak sè yi a kà' nònṣə fa bùu sè wo dzəm yi.

<sup>6</sup> Fana wèṅ jə ṅgàa jìṅ co bùu sè wà. Nga a sè dàpsə lògè weṅ mɔ kot mvwe' nzak ndà wèṅ? A yegè sè ṅgàa ghàak sə.

<sup>7</sup> A soho bupsəgè lɪṅ Jisòs sè bəboṅ sè wèṅ tse' yà'a ka sè wo yeṅ à?

<sup>8</sup> A bəboṅ də wèṅ nònṣə lùk nè Nwì nè yi ṅkum à còm nònṣə ndzənə ṅwàk ye də,

<<Dzəm moma yo mvə'nè wu dzəmgè ni' yò.>>

<sup>9</sup> A ye-a ṅga wèṅ sə jə bwìṅ də mok ghak mok, fana ye də wèṅ gù bup, nə gbùù nè lùk Nwì lan, bùusè wèṅ ka lùk nje nə nònṣə.

<sup>10</sup> Yusə də, ṅwèe nònṣə-a lùuk sə lòoṅ, nə gu bupsə megu nè mò'fis, ye də yi yəyərè bə ṅwè nè yi gù bupsə ye yà' lòoṅ.

<sup>11</sup> Búsè Nwì nè yi à duk də, <<ṅwèe kà nto ko>>, à duk sè' də, <<Kà ṅwè zə.>> Ye də wu ka-a nto kogè, nə zə ṅwè, wu gu sə ṅgà gbù lùk co ṅwè nè yi à gbù yà' pwe', bùusè wù zə ṅwè.

<sup>12</sup> Ye də wèṅ sə cep bum, nə sə gu bum co bùu sè wèṅ rì də Nwii nè kə sak weṅ bə lùk nè yi a nònṣə. Lùk ye nə tse' ṅàṅ sè ṅgòfis me'rə bwìṅ mvwe' bup.

<sup>13</sup> Nwii nə sak ṅwè nè yi kà manziṅ koksègè sè' jì manziṅ, fana bùu sè wo koksəgè manziṅ ka ṅgòwəp nzak yeṅ.

*NgòTse' Dzədzəm Nə Ye NgòGù Fàk*

14 Bwema am wèŋ, a ye-a ŋga ŋwè duk-a dè yi dzəm bohòjisos Krɛst, wù kà yà' bə fàak sè yi sə gùu yə, ye də dzədzəm nè'nə nsàp nè fòlɛ? Aco nsàp dzədzəm nà'nə tɛsə yi à? A bùè.

15 A duk-a dè moma yònè ŋwèmbam kè nè ŋwàŋwè ka cək tse', nè kà zuzu sè' tse',

16 yi və bohòwù, wù duk fa gu yi bə cù də, <<Gèŋ bəboŋ, Nwii se wu, mbuəp kà wu ko, ye zəze', njeè kà wu ya mbà,>> nè kà yi yusè co yi tɛsə ni' ye bə zɛŋ fa, ye də yu bəboŋ sè wù gù sə yà?

17 Dzədzəm bohòncèp Nwì mègù sè' vɛ'nə də, nà' kà-a fàk sə gu, ye də dzədzəm ànə kpə laŋ, nà' ka fàk tse'.

18 Kàmòk aco ŋwè nəmòk duk də, <<Aco ŋwè nəmòk tse' ye dzədzəm, mòk sə gu ye fàk.>> Nwèe duk-a vɛ'nə, mɛ fek ŋgəŋgàŋ duk də, yi niŋ tsok fa-a mɛ dzədzəm ye nè jì fàk, ya mɛ niŋ tsok fa yi dzədzəm am bə fàak sè mù sə gùu.

19 Wù dzəm nè zìnə də Nwì mègù yi nè mò'fis à? A vɛ'nə bəboŋ. Wù rì sè' də yòŋsəə ze' wèŋ dzəmgè sè' vɛ'nə nè sə wəp, nè sə kaŋ. Nsàp dzədzəm nà'nə ka fàk tse'.

20 Ho'ò, wù ləm! Wù sə duk yè'e də wo tsok wu tsè'ə də, wù tse'-a dzədzəm nè nà'a kà fàkgè, ye də nà'a wà à?

21 Wèŋ kək ja'a na. Wèŋ rì də tàcici àvès Abràham a bùuŋ ŋwè nè kəkurè bohòNwì bùu nsàp fàk nè yi a gù də yi fa mo ye Azik co satikà', ka vɛ'nə yɛŋ à?

22 Aco wèŋ ye yàwèŋ sè' də dzədzəm ye à sə gù yùrə be'lə mvwe' mò'fis bə fàak ye, fana fàak ye

sə ɡu boŋsə wesə dzədzəm ye nə.

<sup>23</sup> Yà'a m̀wwe' sè yà' à yəəŋ də yusè wo à còm ndzənə ɲwàk Nwii zìnə. A nja də, <<Abrahàm à dzəm yusè Nwì à cèep, fana Nwì jəŋ yi co ɲwè nè kəkurè.>>

Wo to fa yi liŋ mok də, ɲge'e Nwì.

<sup>24</sup> Wèŋ yə yàwèŋ sè' duk də ɲwèe yegè bəboŋ bohòNwì bə nsàp fàk nè yi ɡu, ka bùu dzədzəm yi yi meɡu.

<sup>25</sup> ɲwà sàhà nè wo à to liŋ ye də Rahàp nà'a à ye bohòyi sè' vɛ'nə. Yi à ye ɲwè nè bəboŋ bohòNwì sè' njo fàk. A ye ɲga yi à ko swìhi ɲgàa mfəep bùu Izùre, nə casə wo m̀wwe' mandzè nè zok.

<sup>26</sup> Mèɡù sè' m̀m̀vè'nè ni' ɲwèe ye-a jì yòŋsè, ye də nà' kɹu laŋ yà'a, dzədzəm nè jì fàak sè' dzədzəm nè nà'a kɹukɹu.

### 3

#### *ɲgə' Nè Aco Lum ɲwè Jəŋ Və*

<sup>1</sup> Bwema am wèŋ, ka bəboŋ co wèŋ ɲkùuŋntèŋ lap mandzè ɲgòye ɲgàa yə'rè bwìŋ bum yeŋ, bùusè səsak ɲjàvès nè vèes yə'rəgè bwìŋ bum nè kè ɡu nduk.

<sup>2</sup> Vès pwe'fo' ɡùgè jòn nèbup. ɲwè nəmòk ye-a yo nè yi kà cù bə jòn cèpgè, ye də yi ka jòn tse' lok. Ye də aco yi riŋ ɲgòkotse' ni' ye bə nsàp mandzè nè fòlòŋ.

<sup>3</sup> A ɡèsə fagè nàambà'rè kwan mə cùhu də ya wo yuk duk, yà' ɡu wo ɲgògì lòm̀wwe' sè a dzəm pwe'fo'. <sup>4</sup> Ja'a na ɲwes sè ghan, sè yà'a ɡìgè mə ndzəpè yè'e nè. Yà' yam maŋgəŋgèŋ, nə sè gi bə ɲàan sè fèfè sè bwì' lòyà' yi. Nà' yam-a sè

ve'nə fana ɲwè nè yi cu ca sə busə ke' nà' bə mɔ̀  
bès tɔ̀ mòk, nà' sə lo mvwe' sè yi sə dzəm sə.

<sup>5</sup> Yà'a mvəsè lɔ̀m ɲwè mègù sè' mɔ̀mvè' anə.  
Nà' gù mwejo, nə sə cep bum sè ghaɲ. Ja'a na  
yòo mvəsè aco mɔ̀ ɲà' mis nè jo ve'ɛ tɛɲ wes  
mfèɲ nda è.

<sup>6</sup> Lɔ̀m nə gù sè' co mis. Nà' tse' nsàap bɔ̀p sè  
sə nzenɲòɲ fɛɛɲ pwe' mbwa. Yi cu ndzə ni'ì vès,  
nə sə gɔ̀ bɔ̀p ye ɲgòsam ke' lo bə ni' nə lònɲfo'.  
Lɔ̀m nə bwe'gè mis nè co nà' tɛɲ səsə wes yòɲsè  
ɲwè lònɲ nè lònɲ, ye jəɲ mvè'nə wo à dzə yi, nə  
kə dzen mvè'nə yi kpɔ̀. Nsàp mis nà'nə tesə vègè  
mvwe' tɛ̀m mis nə bə tu.

<sup>7</sup> Bwìɲ tse' ɲkərèè sè ɲgògù nàamɲgòɲ bə  
swìɲ sè mɔ̀bu nə ye bə nàamndzəp wèɲ lònɲ  
yuk duk. Nsàap yè'sə lònɲ bwìɲ a gù mè yà', yà'  
yuk duk sè' laɲ.

<sup>8</sup> Yu nè mò'fis də ɲwè ka lɔ̀m də ya nà'a yuk  
duk ntògɔ̀ yuk. Bɔ̀p rwìɲ mbwa nèbɔ̀p, nə kà  
mvèk ɲgòcu yòɲsè jə. Nà' tse' lik sè'.

<sup>9</sup> A kwasəgè Tà Nwì nè yi tè' avès sè' bə zen,  
nə sə yak bwìɲ sè Nwì a gù wo ɲgòsəsə yi sè' bə  
zen.

<sup>10</sup> ɲgòkwasə nə ye ɲgòyàk bwìɲ tesə vègè sè'  
mvwe' cùu sè mò'fis. A nə ye co bum yè'sə kà  
ve'nə ye, bwema am wèɲ na.

<sup>11</sup> Kaco mvwe' sè ndzəəp tesə kokgè sə nze,  
ndzəp nə ye lèlɔ̀m nə ye fe'lə sè' cɔ̀cɔ̀k yeɲ.

<sup>12</sup> Kaco tɔ̀ lèmu' zəm pià yeɲ. Kaco ndi' mènɲgù  
zəm lèmu' sè' yeɲ. Nə ye sè' də, kaco ndzəp nè  
nà' sə tesə nə ye cəcəp ye fe'lə sè' bəbɔ̀ɲ yeɲ.

*Nsàap ɲkərè Ba*



<sup>13</sup> Ngà ñkərè ye-a mütsetšə'rə wèŋ yo, yi sə gu-a bum bèboŋ ya bwìŋ rin də yi ngà ñkərè. Yi sə gu yà' bə fùè ngòni də yi tse' nsàp ñkərè nè bèboŋ nə.

<sup>14</sup> Fana wu tse'-a cəpntum, nə ye ngà wa bum bwìŋ, nə ye wi', kà də wu sə kum ke'ca ngùŋ də wù tse' ñkərè duk. Wu yà'sə ñwè nè wù təhə lok zìnə bə m̀vwès.

<sup>15</sup> A ve'nə bùusè ñkərè nè nà' tsə m̀bu bohòNwii kà nsàp nà'nə yegè. Nà'a ñkərè nè sə nze fən, nà' ka yòŋsè Nwì tse', nà'a vègè bohòSatà.

<sup>16</sup> M̀wwe' sè bwìŋ sə wa bum bùu mok, nə sə ye wi', fana bum kà fo' yəyərè bə cù mò'fis gi. Nsàp b̀p sè fòlòŋ nə ye fa'nə sè'.

<sup>17</sup> Nsàp ñkərè nè nà' tsə ma m̀bu bohòNwii yegè ye rərəŋ, nə ye fifi bə fùè. Nsàp ñkərè ànə ka g̀gutu tse', nà'a koksəgè manziŋ bohòbwìŋ, nə sə gu tse' megu bèboŋ ghà yà lòŋ. Nwè nè yi tse' nsàp ntum ànə kà kupsəgè, yi kà bwìŋ sè' sə b̀rè.

<sup>18</sup> Yà' kè lèsə də, bùu sè wo fagè bwìŋ fifi sə bi ngwii fifi, yà'a kùu', nə g̀ŋ, fana wo kə k̀p megu fo' g̀bòŋ.

## 4

### *Wu Ko Bum Nzenğòŋ Nge' Wù Kà Nge'e Nwì Ye*

<sup>1</sup> Nsàp nè wèŋ sə lùlù, nə sə kuəm ke' sə vè bohòwèŋ yè'sə fò? Yà' sə tesə vè bohònsàp ntum jòŋ nè wèŋ tse'. Nsàp ènə sə lù ndzə ni'i wèŋ nùumbu pwe'.

<sup>2</sup> Wèŋ sə dzəm bum, nə kà yà' tse', fana wèŋ ye ŋga'a də wèŋ zə bùu mok wèŋ. Wèŋ sə dzəm bum co wèŋ bɛ' ko yà' bə ɲàŋ, nə kà yà' tse', fana wèŋ sə kùəm, nə sə lùlù. Njo nə wèŋ sə kà bum yè'sə tse', a bùusè wèŋ sə kà Nwì də yi fa wen ɛŋ.

<sup>3</sup> Wèŋ sə ɛŋ, wèŋ kà sə tse' bùusè yusè wèŋ sə tsərə ŋgògù bə zen sə bup. Wèŋ sə ɛŋ mègù bum yè'sə də wèŋ tse' yà' ŋgògù ntuum awèŋ sə kwa.

<sup>4</sup> Wèŋ ŋgàa ko nto wèŋ, co wèŋ ka riŋ də ɲwè nə yi ye-a ŋge' bə bum sè sə nze fɛŋ, kaco yi ye to ŋge' bə Nwì yeŋ riŋ à? A ye-a sè ndà, ŋga yi də yi ko ŋge' bə bum nzeŋgòŋ, ye də yi gù ni' ye ŋgà bèn Nwì.

<sup>5</sup> Yusè yà'a ndzənə ɲwàk Nwì duk də, <<Yòŋsè nə Nwì a nòŋsə nà' ndzə ni'ì vèes dzəmɣè də a ye bùu ye nèbup>>, yà'a ka ŋgàm yeŋ.

<sup>6</sup> A guguŋ ŋgòyù mandzè Nwì, nə ye də bònəm nə yi tse' ŋgòfa ves, tse' gha' ɲàŋ yi nə nòŋsə bum sè bup sè ntuum avès sə dzəm. ɲwàk Nwì nə sə tsè' də,

<<Nwì bèn bùu sè wo nègè ni',

Nə sə fa ɲàŋ bohòbùu sè wo kà ni' nègè.>>

<sup>7</sup> Nà'a njo nə mù sə tsè' wen də, wèŋ fa ni' awèŋ bohòTà Nwì, nə beŋ Satà, ya yi caŋ me'rə wen.

<sup>8</sup> Wèŋ sooŋ kuəp və Nwì ya yi kuəp və wen. Wèŋ ŋgàa gù bup, wèŋ və kə cuk bo awèŋ, nə ye wèŋ bùu sè wèŋ ka tsətsərə rərəŋ tse', gù ntuum awèŋ ye rərəŋ.

<sup>9</sup> Wèenj tsərə bup sè wèenj gùgèə, nə ke' ngùnj bə wan. Wèenj tenjə ywì, nə wan wa, si awènj sè yà' sə rɛɛnj yà'a kupsə, yà'a kpɛ dèmm.

<sup>10</sup> Wèenj jənj ni' awènj sè nze bohòTà Nwì ya yi nə le' lokoksə wenj mɛtsè.

### *Kà Nwè Yò*

<sup>11</sup> Bwema am wènj, ka bəbɔnj co wènj sə yonj ɲwè mòk yɛnj. ɲwè nè yi yo-a moma ye, kè də yi sak nà' àɛ', ye də yi sə gù yà'sə bohòlùk Nwì. A ye-a ɲga wù sak lùk nə, ye də wù ka ɲwè nè wù sə gù yusè lùk nə sə duk yɛnj, wu ɲwè nè wù sə tsərə də wù gha' ɲàanj lùk nə.

<sup>12</sup> ɲgà fa lùk, nə ye ɲgà səsak mègù mò'fis, yi Nwì, a sè yi nè yi tse' ɲàanj sè ɲgòlùnjə ɲwè, nə ye ɲgòzə nà'. Fana wu yè'sə ndà nə co wù sak bwe tè'ɛ yo ɛ?

### *ɲwè Ka Zònj Rìj*

<sup>13</sup> Wèenj yu'rə na jo è, wènj sè wènj sə duk də, <<Ntinə kè zònj è' a nə lo mwɛ' lak yà'a bə yà'a, nə kə cum fo' lùmɲgònj mò'fis, nə seŋ bum fo', nə tse' swe'.>>

<sup>14</sup> ɲga wènj ka yusè yà'a nə gɛ yònjəə awènj sə zònj anə rìj. Yònjəə awènj sə yè'sə yu yà? Yà' megu co mumbà' nè wu yàanj yəgè nà' nè zəzònj, ghàr nà' sam bisə nà'a.

<sup>15</sup> Bògha' co wènj duk ɛ də, <<A ye-a ɲga Tà Nwì dzəm-a vɛ'nə, ɲga a cu ɲwəm, vesùwèenj nə gɛ yu yè'e bə yu yà'a.>>

<sup>16</sup> A ɲga'a də wènj sə kùmɲgùnj, nə sə tse' cù nèbɛp. Nsàp cèp cù nə bə lənjgànj nà'nə bɛp.

17 Ye də ɲwè nè yi rì də yè'e yusè bèboŋ sè co yi ɣu yà', nè kà yà' ɣù, ye də yi ɣù bɔp.

## 5

### *Ntip Nè BohòBù Ngàa Ghàk*

1 Ngàa ghàk wèŋ, wèeŋ yu'rə fa mɔ-a momjo è. Wèeŋ waŋ ke' torə ɲgùŋ bùu nsàp ɲgə' nè nà' sə vè bohòwèŋ mvək momjo.

2 Ghàak awèŋ sə bì bɔp lòo, nzək zɔ vèpsə wes bèbòoŋ cəək awèŋ laŋ.

3 Ndu a ta wes mbàam awèŋ, ndu sə tə ɲgònitsə' də wèŋ tse' njo, yà'a nè ta ɲgùup ni' awèŋ co mis tɛŋ yà' yi. Wèŋ sə lèsə nòŋsə mbàam awèŋ, nè kà rì də nze nè kɔəp ɲgòmè laŋ rì à?

4 Wèŋ a ka bùu sè wo a fàk mɔ nzuù wèŋ mbàam awo lak fa. Yuk-a mvè'nè wo sə wa è. Nwì Tà nè ghaŋ a yuk wa bùu yè'sə laŋ.

5 Wèŋ a zɔ jə nze nè'nə tè nè sə ɣu bum mvəsè yà' bòweŋ. Wèŋ a zɔ, nè fɔə co mbòŋ nè yi sə tək nùmbu nè wo nè sɔə yi.

6 Wèŋ a sak bùu sè bəboŋ co wo bùu sè bɔp, nè zə wo. Wo cum megu gəe'.

### *Ko Ntɔm Nə Sə Lɛŋ Nwì*

7 Ko ntɔm bwema am, tətè Tà kə və. Kɔk ja'a mvəsè ɲga nzum təkɣè də zuzɔ kɔrə mɔ nzuù yi e. Yi kogè ntɔm mvək lùm tè mbùŋ kə li.

8 Wèŋ tse' ɲgòtək sə' vɛ'nə tətè Tà nè və. Vèvè ye nè kɔəp yè'sə laŋ.

9 Wèeŋ kà də wèeŋ ɲwɔrə ke'ca də ɲwè nəmòk sə kà mvəsè wèŋ dzəm sə ɣù ɲwàrè, bwema am

wèŋ na. Njo nə də ya Nwii kà wenj kè sak. Nğà sak nzak nə kuəp ngòvè laŋ.

<sup>10</sup> Tsərə na ngàa tsòhòbum Tà Nwì sè wo anə ye to mantombi yà'a nè. Wo yà'a nsàap ngàa yə ngə', nə sə ko ntum.

<sup>11</sup> Vès duk də wo cu bə kwəkwa bùusè wo ànə sə ye ngə' vè'nə, fana wo kiŋ ntum, nə təəŋ mali guguŋ, nə kà mè'rè. Mù ri də wèŋ à yuk mvəsè Jup à kì ntum ghà nè məmumsè a vè bohòyi, fana Tà Nwì kə se yi maŋkwèŋ yà'a laŋ. Bə nè zìnə, Tà tse' koksəmanziŋ bohòvès cèbùè.

<sup>12</sup> Yumòk sè yà' gu càsə də, wèəŋ cu ngòcèp yumok, wèŋ kà kèŋ, bwema am wèŋ a. Kà də wèəŋ kəŋ ntòbu kè nzeŋgòŋ, kènə də wèəŋ kəŋ to liŋ yumok duk. Bòdə wèəŋ duk megu də <<Ŋ>> nga wèŋ dzəm, nə duk də <<Hai'>> nga wèŋ ka dzəm.

<sup>13</sup> A ye-a nga ŋwè nəmòk sə yə ngə', boŋ də yi ləŋ Nwì, fana a ye-a nga mòk sə kwa ye kwa, yi yəm kuksə liŋ Nwì bə ŋkì.

<sup>14</sup> Nğà yiyaŋ ye-a mətsetsə'rə wèŋ yo, yi to bù ŋkwàha bùu sè mu cos, wo kə ləŋ fa yi pìriyà. Wo ləŋ, wo yok yi bə mve' mənə liŋ Tà Jisòs.

<sup>15</sup> Pìriyà nè wo ləŋ nà' bə dzədzəm nə, nà'a nə gu yiya nə me. Tà Jisòs nə gu yi guŋ fe'lə səmok. A ye-a nga yi à gù bup, Nwì swifa yi yà' sè'.

<sup>16</sup> Fana bòbohòwèŋ də, mòok tsoho fa mòk bup ye sè yi gùu, mòok tsoho fa mòk sè' vè'nə, ya mòok ləŋ fa mòk, mòk ləŋ fa mòk nə sè', ya yiyaŋ kà wenj ya, ya Nwii luŋsə wenj. Nsàp pìriyà ŋwè nè yi kəkàrè tse' nàŋ nja ngògù bum nèbup.

17 Alajà à ye sè' ηwè co vesùwèη vε'ε, nè lεη Nwì nè zìnə də mbùηη kà li. Mbùη à ci'i, nè kà sə nze cəəm mənə luumηgòη tε' bə bwes.

18 Anə geη, yi lεη fe'lə səmok, mbùη li tsoη mabu nèbup, fana bum to.

19 Bwema am wèη, a ye-a ηga mòk mətsetsə'rə wèη jàm me'rə-a mandzè Nwì nè zìnə nə, fana mòk kə jəη fəsə və yi səmok.

20 Rìηtse' də a ye-a sè ndà pwe' nè yi fis fəsə vè ηgà gù bup mwwe' bup ye, ηwè ànə bwì və mwwe' mandzè nè bèboη, fana ye də yi fèp fis fa ηgà gù bup ànə yòηsə ye mwwe' kpə, nè swihi bup sè co wù kà fùk.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c475d5b3-da44-51cf-93ca-f255b72fe481